

PROPERTII

non me Chaoniae vincant in amore columbae 5
 dicere, quos iuvenes quaeque puella domet.
 me dolor et lacrimae merito fecere peritum:
 atque utinam posito dicar amore rudis!
 quid tibi nunc misero prodest grave dicere carmen
 aut Amphioniae moenia flere lyrae? 10
 plus in amore valet Mimnermi versus Homero:
 carmina mansuetus lenia quaerit Amor.
 i quaeso et tristis istos compone libellos,
 et cane, quod quaevis nosse puella velit!
 quid si non esset facilis tibi copia? nunc tu 15
 insanus medio flumine quaeris aquam.
 necdum etiam palles vero nec tangeris igni:
 haec est venturi prima favilla mali.
 tum magis Armenias cupies accedere tigres
 et magis infernae vincula nosse rotae, 20
 quam pueri totiens arcum sentire medullis
 et nihil iratae posse negare tuae.
 nullus Amor cuiquam faciles ita praebuit alas,
 ut non alterna presserit ille manu.
 nec te decipiat, quod sit satis illa parata: 25
 acrius ille subit, Pontice, si qua tua est;
 quippe ubi non liceat vacuos seducere ocellos,
 nec vigilare alio nomine cedat Amor.
 qui non ante patet, donec manus attigit ossa:
 quisquis es, assiduas ah fuge blanditias! 30